

FIZOTRY NY SORONA MASINA

FIARAHABANA

Tononkira fidirana (mitsangana - hiraina)

Pretra (P) - Amin'ny anaran'ny Ray sy ny Zanaka sy ny Fanahy Masina.

Vahoaka (V) - Amen.

P. Homba antsika mianakavy anie ny fahasoavan'i Jesoa Kristy Tompontsika sy ny fitiavan'Andriamanitra Ray ary ny firaisana amin'ny Fanahy Masina.

V. Ho tanteraka tokoa anie izany.

Fifonana (mitsangana - hiraina)

P. Aoka isika mianakavy hiaiky ny fahotantsika, hahafahantsika miara-mankalaza sy manatanteraka izao Sorona Masina izao.

Hira Fifonana

P. Hamindra fo amintsika anie Andriamanitra mahefa ny zavatra rehetra ary hamela ny fahotantsika, ka hitondra antsika any amin'ny fiainana mandrakizay.

V. Amen.



Voninahitra (mitsangana - hiraina)

(tsy misy Voninahitra rehefa fotoanan'ny Karemy sy ny Avent)

Hira Voninahitra

Vavaka fangatahana (mitsangana)

Manao fivavahana ny Pretra, isika kosa mankatò izany ka mamaly hoe:

V. Amen.

FANKALAZAN'NY TENIN'ANDRIAMANITRA

Famakiana ny Tenin'Andriamanitra (mipetraka)

1-Vakiteny voalohany: Testamenta taloha na Asan'ny Apostoly

Mpamaky teny: - Izany àry ny Tenin'ny Tompo.

V. Hisaorana anie Andriamanitra.

2-Salamo na hira ho setrin'ny vakiteny (hiraina)

3-Vakiteny faharoa: Asan'ny Apôstôly na taratasy nosoratany.

Mpamaky teny: - Izany àry ny Tenin'ny Tompo.

V. Hisaorana anie Andriamanitra.

Aleloia na fihobiana hafa (mitsangana)

4-Vakiteny fahatelo: Evanjely.

P. Homba antsika mianakavy anie ny Tompo.

V. Ho tanteraka tokoa anie izany.

P. Evanjely masina nosoratan'i Masindahy...

V. Voninahitra anie ho Anao, ry Tompo.

P. Izany àry ny Tenin'ny Tompo.

V. Dera anie ho Anao, ry Kristy.

Ny toriteny (mipetraka)

Fiekem-pinoana (mitsangana - hiraina)


Ranombavaky ny mpino (mitsangana)

P. Teny fanoloran'ny ranombavaky ny mpino

Misy fiverenana hiraina

P. Teny famanarana ny ranombavaky ny mpino

V. Amen.



EOKARISTIA

Tononkira fanolorana (mipetraka - hiraina)

P. Aoka hivavaka isika mianakavy mba hankasitrahana'Andriamanitra Ray mahefa ny zavatra rehetra ity sorona atolotro sy atolotrareo ity.

V. Horaisin'ny Tompo anie ny Sorona atolotry ny tãnanao, hanomezana dera sy voninahitra ny anarany, ary koa hanasoavany antsika sy ny Egliziny masina manontolo.

Vavaka fanolorana (mitsangana)

Manao fivavahana ny Pretra, isika kosa mankatò izany ka mamaly hoe:

V. Amen.

Vavaka fisaorana

P. Homba antsika mianakavy anie ny Tompo.

V. Ho tanteraka tokoa anie izany.

P. Asandrato àry ny fo.

V. Efa any amin'ny Tompo ny fonay.

P. Isaory ary ankasitrahao ny Tompo Andriamanitsika.

P. Mendrika sy rariny tokoa ary mety sady mahavonjy ny misaotra Anao lalandava hatraiza hatraiza, ry Tompo, Ray masina, Andriamanitra mahefa ny zavatra rehetra sy mandrakizay


Masina (mitsangana - hiraina)

Fiantsoana ny Fanahy Masina (mandohalika)

P. Eny, masina tokoa lanao, ry Tompo, loharanon'ny fahamasinana rehetra, koa mihanta Aminao izahay, arotsahy ny Fanahinao ho toy ny andon'ny lanitra hanamasina ireto fanomezana ireto, ho zary Vatana sy Ran'i Jesoa Kristy Tomponay.

Fankamasinana

P. Fa tamin'izy efa hatolotra hijaly, ka nanaiky an-tsitra-po, dia nandray mofo ary nisaotra, nizarazara sy nanome azy ny mpianany nanao hoe:



Samia mandray sy mihinana amin'ity ianareo: fa Vatako ity hatolotra ho anareo.

Toy izany koa, nony avy nisakafo, dia nandray ny kalisy izy, nisaotra indray ary nanome azy ny mpianany nanao hoe:

Samia mandray sy misotro amin'ity ianareo: fa kalisy misy ny Rako ity, Rà iorenan'ny fanekem-pihavanana vaovao sady mandrakizay, halatsaka ho anareo sy ho an'ny be sy ny maro ho famelàna ny fahotana. Ataovy izao ho fahatsiarovana Ahy.

Fihobiana an'i Kristy *(mitsangana)*

P. Lalina sy mahagaga ny ataon'Andriamanitra ho antsika.

V. Manambara ny nahafatesanao izahay, ry Tompo, mankalaza ny nitsangananao, miandry ny hiavianao amim- boninahitra

Eny, mahatsiaro ny Zanakao maty sy nitsangan-ko velona izahay, ka atolotray Anao, ry Tompo, ny mofo antoky ny fiainana sy ny kalisy antoky ny famonjena; ary velom-pisaorana izahay fa nekenao ho mendrika hijoro eto anoloanao sy hanao fanompoam-pivavahana Aminao. Ary mitalaho an-tànan-droa izahay mba hatambaty ny Fanahy Masina ho iray fa miombona anjara amin'ny Vatana sy ny Ran'i Kristy.

Fanolorana ny vatan'i Kristy

Amin'ny alàlany sy miraka aminy ary ao aminy, ry Andriamanitra Ray mahefa ny zavatra rehetra, dia Anao avokoa,ao amin'ny Fanahy Masina, ny haja amam-boninahitra amin'ny taona rehetra mandrakizay.

V. Amen.

Fiomanana amin'ny komonio *(mitsangana)*

P. Manaraka ny didy nomen'ny Mpamonjy isika, ary nampianarin'Andriamanitra, ka sahy manao hoe :

Rainay any an-danitra *(hiraina)*

P. Eny, manafaha anay amin'ny ratsy rehetra, ry Tompo, ary mba fenoy ny fiadananao ny andro iainanay; enga anie hombàn'ny indrafonao izahay, ka sady ho afaka mandrakariva amin'ny fahotana no hilamina tsy ho azon-tebiteby na toy inona na toy inona, eto am-piandrasana ny hasambarana nampanantenainao sy ny fiavian'i Jesoa Kristy Mpamonjy anay.

V. Fa Anao ny fanjakana sy ny hery ary ny voninahitra mandrakizay

Ny fiadanana

P. Ry Jesoa Kristy Tompo, lanao nilaza tamin'ny Apôstôlinao hoe: Fiadanana no avelako ho anareo, ny fiadanako no omeko anareo: aza ny fahotanay no jerena fa ny finoan'ny Eglizinao; ka ho sitrakao anie ny hampiadana azy sy hampiray azy araka ny sitraponao. Fa lanao velona sy manjaka amin'ny taona mandrakizay.

V. Amen.

P. Homba antsika mianakavy mandrakariva anie ny fiadanan'ny Tompo.

V. Ho tanteraka tokoa anie izany.

P. Aoka haneho am-pahibemaso isika fa mihavana ao amin'ny fiadanan'i Kristy.



P. Ny Vatana aman-dRan'i Jesoa Kristy Tompontosika anie ho antoky ny fiainana mandrakizay ho antsika mandray azy.


Zanak' Ondry *(mitsangana – hiraina)*

KOMONIO

P. Sambatra izay voaantson'ny Zanak'ondry amin'ny fanasany.

Inty ny Zanak'ondrin'Andriamanitra, inty ilay manala ny fahotan'izao tontolo izao.

V. Tompo ô, tsy mendrika hidiranao ato amiko aho, fa manonòna teny iray ihany dia ho sitrana ny fanahiko.



Hira ny Komonio

Vavaka aorian'ny Komonio *(mitsangana)*

P. Aoka isika hivavaka

V. Amen.

FAMARANANA

P. Homba antsika mianakavy anie ny Tompo.

V. Ho tanteraka tokoa anie izany.

P. Hitso-drano antsika anie Andriamanitra mahefa ny zavatra rehetra, ny Ray sy ny Zanaka sy ny Fanahy Masina.

V. Amen.

Pretra na diakra:

Hitantana ny diantsika anie i Kristy.

V. Hisaorana anie Andriamanitra